

欽
定
全
唐
文

欽定全唐文卷一百六目錄

新文藝出版社藏書

後唐明宗一

令河南府諸道津送諸王眷屬教

令人戶供田數教

授鄭珏任園中書侍郎制

復郭崇韜朱友謙官爵財產制

貶豆盧革韋說制

責授豆盧革韋說司戶參軍制

授盧文進義成節度使制

改名制

授馮道崔協中書侍郎制

封王延鈞瑯琊王制

任園罷相制

鄭珏罷相制

褒夔州刺史西方鄴制

討王都制

誠勵長吏制

進封趙德鈞制

進封王晏球等制

有事南郊制

郊禋禮畢賜將士錢帛制

減拜郊行事官選數制

授李愚中書侍郎制

授趙鳳門下侍郎制

以災旱蠲貸制

追冊晉國夫人夏氏爲昭懿皇后制

欽定全唐文卷一百六

後唐明宗

帝諱亶初名嗣源代北人世事太祖遂從姓李氏唐咸通八年生同光元年授蕃漢馬步總管加太尉四年四月即位改今名長興元年上尊號聖明神武文德恭孝皇帝四年再加尊號聖明神武廣道法天文德恭孝皇帝在位八年年六十七諡曰聖德和武欽孝皇帝廟號明宗

令河南府諸道津送諸王眷屬教

寡人允副羣情方監國事外安黎庶內睦宗親庶諧敦敘

之規永保隆平之運昨京師變起禍難薦臻至於戚屬之聞不測驚奔之所慮因藏竄濫被傷夷言念於茲自然流涕宜令下河南府及諸道應諸王眷屬等昨因變起出奔所至即時津送赴闕如不幸物故者即量事收瘞以聞

令人戶供田數教

今年夏苗委人戶自供通頃畝五家爲保本州具帳送省州縣不得差人簡括如人戶隱欺許人陳告其田倍徵其百姓合散蠶鹽每年抵二月內一度俵散依夏稅限納錢夏秋苗畝稅子除元徵石斗及地頭錢餘外不得紐配

授鄭珏任園中書侍郎制

欲運陰陽賢者諒資於籌畫將烹鼎飪哲王取喻於鹽梅
是知心恬淡則變理無差意平正則調和靡慝王者以二
儀爲法百度是貞將施理國之規必慎代天之任其有鎮
時望重濟物才高或早推房杜之風或暗合孫吳之略咸
膺妙選適副旁求光祿大夫太子賓客上柱國滎陽郡開
國侯食邑一千戶鄭珏禮樂成家鈞台接武珪璧耀無瑕
之彩咸韶奏希代之音雅度不羣貞規拔俗爲縉紳之楷
範作文學之宗師歷踐華資嘗居重任舒卷罔渝於古道

坦夷不易於沖襟允謂正人實符休運正議大夫守工部
尚書上柱國樂安縣開國男食邑三百戶賜紫金魚袋任
園儒元繼代簪組傳芳蘊穰苴文武之才抱季子縱橫之
略早參戎幕旣備展於良謀洎厯尹京復廣敷於善政掩
李牧防虞之術繼蕭何饋運之勞安北邊而顯賴殊功伐
西蜀而固資婉畫及康延孝忽從劒閣欲襲錦川統戎至
及於三千破賊將踰於萬數姦凶盡戮邛蜀再寧靜十道
之妖氛息三川之生聚遠提銳旅來赴上京適當纂紹之
初尤驗忠貞之節而鬱於人望協彼僉諧宜膺並命之榮

允謂當仁之選或外書殿或掌國租冀伸致主之嘉猷別
展富民之茂績於戲位尊百辟職總萬機公忠則庶政惟
和便辟則彝倫攸斁慎宜九德勉阜羣生珏可中書侍郎
兼刑部尚書平章事集賢殿大學士園可金紫光祿大夫
中書侍郎兼工部尚書平章事判三司

復郭崇韜朱友謙官爵財產制

故西道行營都招討制置等使守侍中監修國史兼樞密
使郭崇韜宜許歸葬其世業田宅並還與骨肉故萬州司
戶朱友謙可復護國軍節度使守太師兼尚書令河中尹

西平王所有田宅財產並還與骨肉

貶豆盧革韋說制

革則縱田客以殺人說則侵隣家而奪井選元亨之上第
改王參之本名或主掌三司委元隨之務局或陶鎔百里
受長吏之桑田咸屈塞於平人互阿私於愛子任官匪當
黷貨無厭謀人之國若斯致主之方安在旣迷理亂又昧
卷舒而府司案牘爰來諫署奏章疊至備彰醜迹深汙明
庭是宜約以三章投之四裔其河南府文案及蕭希甫論
疏並宜宣示百僚

責授豆盧革韋說司戶參軍制

豆盧革韋說等身爲輔相手握權衡或端坐稱臣或半笑
奏事於君無禮舉世寧容革則暫委利權便私俸祿文武
百辟皆從五月起支父子二人偏自初正給遣說則自居
重位全紊大綱敘蔭貪榮亂兒孫於昭穆賣官潤屋換令
錄之身名醜行疊彰羣情共怒雖居牧守未塞非尤革可
責授費州司戶參軍說可夷州司戶參軍皆員外置同正
員並所在馳驛發遣

授盧文進義成節度使制

契丹盧龍軍節度使檢校太尉盧文進遼西飛將薊北雄
才頃以被讒因而避禍雖附茹毛之俗長懷向國之誠將
軍寧屈於虜庭校尉終還於漢壘洎於纂紹果卜旋歸繼
飛鴈足之書累殄龍庭之虜前冒白刃中推赤心擁塞垣
之車帳八千復唐土之民軍十萬氣吞沙漠義貫神明爰
降寵章以旌壯節可特進依前檢校太尉同中書門下平
章事使持節滑州諸軍事守滑州刺史充義成軍節度滑
濮管内觀察處置等使仍封范陽郡開國侯食邑一千三
百戶兼賜推忠翊聖保義功臣

改名制

王者祇敬宗祧統臨寰宇必順體元之典特新制義之文
朕以眇躬獲承丕構襲三百年之休運繼二十聖之耿光
馭朽納隍夕惕之心罔怠法天師古日躋之道惟勤今則
載戢干戈混同書軌荷元穹之睠佑契兆庶之樂推簡玉
泥金非敢期於薄德耕田鑿井誠有慕於前王將陳享謁
之儀即備郊丘之禮宜更稱謂永耀簡編今改名爲亶凡
在中外宜體朕懷

授馮道崔協中書侍郎制

欽定全唐文

卷一百六

後唐明宗

五

昔舜命臯夔百揆時敘湯命仲虺萬國咸寧道旣合於君
臣事實光於今古朕克相上帝敷佑下民惟順考於典墳
俾旁求於彥傑升之廊廟付以鈞衡期共理於寰區冀永
康於黎庶厥有明哲咸謂碩儒早隆佐命之功久負濟時
之器必使膺茲大任弼我不丕基旣詢謀以僉同固朕志而
先定爰行並命是降寵靈端明殿學士朝議大夫守尚書
兵部侍郎上柱國賜紫金魚袋馮道四瀆凝休五行鍾秀
積善克承於家訓揚名端守於素風孔門曾顏寧同懿行
漢庭嚴樂詎比宏才溫恭爲君子之儒慤厚有大臣之體

故自從龍契會倚馬摘詞首贊先朝紹隆丕業爲善不伐
有能不矜守廉貧則罔恥緼袍持慎審則靡言溫樹自予
纂嗣賴爾弼違爰精選於禁林乃特遷於祕殿愈陳規誠
屢罄論思都正直以莫倫諒真純而罕匹銀青光祿大夫
守太常卿判吏部尚書銓事上柱國崔協星辰降彩軒冕
聯榮禮樂稟於生知詩書博於時習輝華繼世可鄙荀陳
清貴傳家固超王謝自登高第踐歷周行居省闈則職業
備修升憲府則朝綱克振近者委司選部命典秩宗轄彼
銓衡則羣才適序調其律呂則雅音克諧旣揚正始之風

可驗中和之德並以功庸夙著問望彌高宜允副於具瞻
俾顯當於爰立是命寵升黃閣光弼紫宸或居書殿之榮
俱列戶封之貴仍加峻級以示新恩道旣叶於咨詢心乃
符於啟沃於戲知人則哲予竊慕於前王事君盡忠爾已
聞於當代更宜夙夜慎保初終使社稷以無憂期子孫之
有賴往踐厥位汝惟戒哉道可正議大夫中書侍郎平章
事充集賢殿學士協可中書侍郎平章事

封王延鈞瑯琊王制

朕聞襲弓裘之美惟孝承家秉旄鉞之權惟忠報國其有

顯居世祿傑出時材疾風端勁草之心積雪驗貞松之節
恐毀我室非閱於牆宜遵紹續之文俾授統臨之寄爰於
剛日特舉彝章威武軍節度觀察留後起復雲麾將軍檢
校太傅使持節舒州諸軍事守舒州刺史兼御史大夫柱
國瑯琊縣開國伯食邑七百戶王延鈞拱北華星圖南巨
翼垂金精於元象刷玉宇於雄風而自阜蓋分憂清源共
理五馬之聲光首出八龍之價譽相高旣綰圭符俄從金
革在原無惠咸推晉后之賢當璧有徵大叶楚人之望而
又上欽天眷旁沮物情守祖考之貽謀却蕃宣之承制心

傾皎日義惡浮雲建溪之誓帶如河閩嶺之礪山齊嶽父
風宛在臣節彌堅是命高建牙璋洞開玉帳錫以油幢瑞
節廣其渌水紅蓮寵冠阿衡貴同緹騎尊以師而表敬實
其戶而增封併示貞榮仍加懿號於戲象賢務德克揚嗣
子之名進律推恩當顯使臣之禮勉膺殊渥永保令圖可
依前授起復雲麾將軍右金吾衛大將軍外置同正員檢
校太師守中書令福州大都督府長史充武威軍節度福
建管内觀察處置兼三司發運節度封瑯琊王

任圜罷相制

朕恭膺大寶虔荷丕基選衆與能克保君臨之道寶賢念
舊庶符帝賚之資繇是推以腹心授之衡柄冀扶持於寡
昧申啟沃於始終其有樂在晏安勇於沖退宜暫均於勞
逸思顯示於優隆光祿大夫門下侍郎兼工部尚書平章
事監修國史上柱國樂安郡開國侯食邑一千戶任圜天
授宏材波澄偉度早負公侯之器深懷將相之資智擅圓
方謀惟通變先皇帝中興景運再造鴻圖夙參佐命之功
迴著安時之業克平邛蜀大掃妖氛鬱有殊庸雅爲良弼
朕惟薄德尋所注懷爰自六卿擢居四輔秉國鈞之重任

掌邦計之劇權內罄沃心外彰陳力方期委任遽閱封章
曲徇汝懷固違朕旨旣披陳而莫抑在進退之有常宜更
鳳沼之尊俾踐龍樓之秩勉從頤養勿替謀猷可落平章
事守太子少保

鄭珏罷相制

朕聞老氏談經無如知止素王窮易當在庶幾賢哲所以
保身進退於焉合道其有位居元輔功敘彝倫節宣微爽
於沖和休致屢堅於章表酌其陳力莫若從人俾迴席於
三台就懸車於百揆特進行門下侍郎兼刑部尚書同中

書門下平章事充太微宮使宏文館大學士上柱國滎陽
郡開國公食邑一千五百戶鄭珣皇朝軒冕清廟笙鏞崇
令望於縉紳節雅音於律度而自再持鈞軸益顯公忠尋
更近市之居兼杜掃門之跡克已復禮爲官擇人爰屬巡
幸浚郊務名賢而好善經營雒邑煩上相以卜年方賴嘉
猷忽嬰美疹豆耳何妨於寂聽灰心頓悟於浮榮高慕赤
松勇辭黃閣朕以方調殷鼎尚睠晉鑄欲盡慇懃具觀堅
切可久之規斯在再三之請莫違所以特許抽簪免勞借
箸進崇階於開府假優秩於不朝仍益井田俾厚風俗於

戲祁奚請老不無內舉之規張禹言情亦有私恩之事唯
卿奉身而退其德不回予實嘉焉美兼善也勉從頤養永
保初終可開府儀同三司尚書左僕射致仕仍加食邑五
百戶

褒夔州刺史西方鄴制

夫忠而能力蓋臣子之嘉猷賞不踰時乃君親之大義其
有一心奉國萬里勤王宣至化於遐陬振威聲於異俗宜
升寵秩式示優恩竭忠建策興復功臣東南面行營副招
討使寧江軍節度觀察等使光祿大夫檢校司徒使持節

都督夔州諸軍事守夔州刺史西方鄴壯節挺生英材間
出居家克孝事主能忠總銳旅以邁征飛捷書而薦至一
日千里復峽內之土疆七縱七擒盪荆門之妖祲近令偏
將徑取敵城運籌之智神輸破竹之威電速漸平兔穴當
覆梟巢方堅倚仗之誠宜降褒崇之命俾兼爲保益重殿
邦旣虎踞於上流佇鯨吞於下瀨於戲功名旣立節義彌
高鼎鐘方示於鐫銘綸綍寧煩於訓誡唯期帶礪永協雲
龍可檢校太保使持節都督夔州諸軍事守夔州刺史寧
江軍節度觀察等使

討王都制

王者君臨八表子育萬民務匿瑕含垢之仁引禁暴戢兵之德每存寬恕貴就和平其有受國深恩承家舊履乖失臣節包藏禍心萌悖亂以欺天資貪殘而害物苟無征討曷示紀綱義武軍節度觀察等使檢校太尉兼中書令守定州刺史太原郡王王都猥以凡材託於盛族梟獍之凶早縱豺狼之性不移位極人臣跡無忠孝自朕纘承大業懷輯羣方山河之寄愈堅帶礪之盟益甚凡於事體每務優崇骨肉淪落者並致歸還嗣息薦論者遍加任使一門

受寵九族同榮近以家艱疊頒國命行弔遠繫於卿士奪情尋復於公侯繼下絲綸薦及垣翰在予之分於爾何虧而屬者所爲頻彰逆狀徵發不從於朝命賦租罔係於省司擅致軍都遍抽編戶專修城壘潛造甲兵說誘佐命藩臣留滯歸朝刺史賴皆忠順尋各奏聞曾令近侍馳書責使深思改過載惟撫御敢怠含宏近乃長惡靡悛亂常尤甚遣姦人招軍前節級出妖言惑管內生靈兼挂牒文已爲邊患闔境之蒸黎愁沮遠遣告陳鄰藩之主帥封章共期戡定其王都宜削奪在身官爵仍令馬步兵士於州側

近權置行州招誘在州軍人百姓及安撫鄉川人戶於戲
不祥之器寧願舉於干戈無罪之民豈忍墜於塗炭將行
弔伐倍軫情懷勉施拯救之功勿致傷夷之弊雖軍威須
振在王道無虧凡百戎臣當體朕意宣布遐邇咸使聞知

誠勵長吏制

朕自承天命恭襲帝圖務令黔黎永安非止皇居獨樂當
艱虞之際與良將共靜邊塵及開泰之時於諸侯並崇官
爵旣酬勲而示寵賴撫俗以經心託在無私期於共理有
功者切於慶賞有過者非所願聞陶玘以偶違勅條無柰

何而從謫宦廷隱以全虧公道不獲已而就極刑乃朝典之須行實朕心之不樂備軫泣辜之念更嚴加禁之規況在藩方皆明理本節度使等時號山河之主縣令亦人呼父母之君並切爲時皆勤布化不獨榮於身世兼乃慶及子孫當虔夕惕之懷同廣日新之政各處有功之地永爲無過之人宜體朕懷共資王道

進封趙德鈞制

朕聞魏絳和戎始克諧於金石祭遵征虜終併息於煙塵此乃先務柔懷後申禁暴明國家之耀德表藩翰之圖功

既立丕勲宜加懋賞興邦守正翊贊功臣盧龍軍節度管
內觀察處置押奚契丹兩蕃經略盧龍軍等大使特進檢
校太尉同中書門下平章事幽州大都督府長史上柱國
天水縣開國侯食邑一千戶趙德鈞崆峒稟氣渤海融精
傳將略於黃公受兵符於元女而自羈縻戎馬控制盧龍
洞曉蕃情飽諳邊事獲其五利嘗姑息於鮮卑運以六韜
果生擒於惕隱可謂坐籌帷幄能執干戈終殄寇於中山
永摧凶於外域犬羊南牧賴掃蕩於尋時貔虎北征遂凱
旋於此日加以民軍胥悅畏愛並行薊門之人物如初燕

谷之粢盛畢備得不疇其庶績褒以徽章就加進律之文
式叶陟明之典是命寵頒鳳綽榮列貂冠正爵位於三公
加井田於千戶貴申殊渥仍賜真封於戲事君之節已彰
燕山紀頌教子之方大著踐土臨戎有國有家惟忠惟孝
享茲具美永保令猷可依前檢校太尉兼侍中幽州大都
督府長史充盧龍軍節度觀察等使進封開國公加食邑
五百戶食實封一百戶

進封王晏球等制

朕嘗披國史備閱軍功裴度之破淮西無遺廟算石雄之

攻山北益展皇威莫不仰遺烈於祖宗委全才於將相而
自中山逆命外域朋姦奪戎旅以鷹揚屠賊兵而魚爛夕
聞告捷朝賞殊勲竭忠建策興復功臣北面行營招討歸
德軍節度宋亳單潁等州觀察處置亳州太清宮等使權
知定州軍州事特進檢校太傅同中書門下平章事使持
節宋州諸軍事宋州刺史上柱國瑯琊郡開國侯食邑一
千戶王晏球長劒倚天洪河帶地居萬夫之長擅三傑之
名黃石兵書運子房之籌略清淮公族興仲爽之源流自
統雄師往收逆壘摧曲陽之堅陣厭滹水之驚波爰築室

以反耕攻圍雉堞果析骸而易子傾覆鳥巢招降之士庶
數千撲滅之凶狂非一王都授首禿鋏生擒火焚而惡蔓
皆除電掃而妖氛併息諒茲丕績宜降優恩迺眷汶陽實
惟巨鎮據犬牙之內地當馬頰之要津是命疇以勲庸福
其黎庶進國公之品秩崇藩后之等威俾濬鳳池仍加蟬
冕帷幄共推於重席井田兼別於真封於戲解甲休兵實
歸於上將安民和衆議仗於賢臣永保令猷無替朕命可
依前檢校太傅兼侍中使持節鄆州諸軍事守鄆州刺史
充天平軍節度齊棣等州觀察處置使仍進封開國公加

食邑一千五百戶食實封一百戶行營副招討橫海軍節度觀察等使守滄州刺史李從敏可光祿大夫檢校太保使持節定州諸軍事守定州刺史充義武軍節度觀察北平軍等使進封開國伯加食邑一千二百戶北面行營兵馬都監鄭州防禦使張虔釗可光祿大夫檢校司徒使持節滄州諸軍事守滄州刺史充橫海軍節度觀察等使仍封清河縣開國子食邑五百戶

有事南郊制

朕自嗣守丕基勤修庶政於茲四稔罔怠萬機上實賴乎

祖宗下必資於卿士卑躬克儉景行前王側席求賢追蹤
往哲日懼一日雖休勿休幸致風雨不憊干戈載戰九穗
之禾應瑞足表豐年兩階之舞咸賓無虧曠代敢萌矜伐
漸喜隆平然而圓丘之禮未陳清廟之詩未著夙宵增懼
寤寐興懷何以助天之高而報地之厚也且天覆予爲子
民戴予爲君苟帝道未臻則人倫焉正必須燔柴瘞玉嚴
六宗虞典之禋非敢刻石泥金竊萬歲嵩高之美凡在遐
邇當體至懷朕取來年二月十一日有事於南郊

郊禋禮畢賜將士錢帛制

朕恭荷丕圖獲申大禮蓋股肱之叶力環衛之輸忠將士等扈從乘輿警巡晝夜咸彰勞瘁深所嘉稱各示頒宣以明酬獎宜令三司依等第勘會指實人數指揮支給其諸道州府如本處有絹帛準價折支無見在錢物即就便支遣兼差使臣各往逐處宣賜仍下六軍諸衛準此告諭

減拜郊行事官選數制

獲遇拜郊遠來行事既施微效宜被優恩欠一選者宜令待闕欠兩選者減一選欠三選四選者減兩選欠五選六選者減三選欠七選八選者減四選欠九選已上者減五

選三司勒停官顯有過愆遂當停替不逢大禮終是棄人
仍令所司以罷官理選赴常調如是今年合格者許令待
闕注擬仍委吏部南曹依元簡勘事節合減選數給付牒
知

授李愚中書侍郎制

衡之平不欺於物水之止洞鑑於形厥有操心稱而無撓
重輕掛人鏡而自分妍醜所以旁求多士果得正人符夢
卜而惟吉之從舉賢良而不仁者遠命爲予弼僉曰汝諧
朝議大夫守太常卿上柱國隴西縣開國男食邑三百戶

金史卷之五
賜紫金魚袋李愚勁草凌風孤松抱雪向厯艱難之運再
逢開泰之期先皇擢在禁林輟隨征旆鋒鏑翰墨經劒閣
而無競刊銘糞土珠金入刀州而未嘗關夢罔矜諭蜀素
蘊致堯洎朕纘紹丕圖服勤內署慎密而不言溫樹論思
而守奉甘泉及掌文闡大開公道樹杏壇而重興四教厯
蘭省而再陟二卿當祀周郊密承殷誥泥金而將期獻頌
擊石而尋致來儀旣厯試諸艱且爰立作相是命亞鳳池
之貴位領虎殿之羣儒仍進崇階兼加好爵於戲久虛右
席俾運前籌期偃戢於干戈致混同於書軌以毗乃辟正

事惟醇則霖雨鹽梅於是乎在可正議大夫守中書侍郎
平章事集賢殿大學士

授趙鳳門下侍郎制

朕聞變理陰陽霖雨之功是託調和鼎鼐鹽梅之味攸憑
蓋貞淳則克契二儀正直則允諧庶品必在懸衡秉志定
鏡操心苟無爽於毫釐則潛符於造化將付代天之柄宜
歸不世之才今得良臣庶臻治道端明殿學士中大夫尚
書兵部侍郎上柱國賜紫金魚袋趙鳳丹山瑞彩赤堇靈
鋒清明猶水鏡冰壺質厚若渾金璞玉動惟稽古靜可鎮

時夢傳五色之毫文章煥爛力就三冬之志學藝縱橫頃
在禁林嘗傳職業始中原之大定屬萬國以來朝制命聯
縣詔書疊委共歎立成之敏略無停綴之時洎朕承基復
資演誥俄遷居於祕殿嘗密贊於鴻圖實賴謀猷每嘉經
濟爰司貢部俾選儒徒果無遺逸之名足見搜羅之道昨
朕將還維邑特委浚郊一時權藉於殿邦期月尋聞於報
政恩威並設賞罰皆明夷門無夜柝之喧梁苑遂春臺之
樂克膺重寄允謂周才宜顯處於巖廊貴大施於陶冶黃
扉峻秩粉署崇資兼煩筆削之功更代簡編之職勲階並

進爵邑惟新足爲爰立之榮在體勤求之意唯思啟沃端
俟弼諧於戲應夢卜之祥當股肱之任關羣生之休戚繫
萬宇之安危社稷是平寰瀛繫賴勉勤夙夜無怠初終勿
令伊說臯夔咸擅美於前也可正議大夫門下侍郎兼工
部尚書同平章事監修國史上柱國仍封天水縣開國男
食邑三百戶

以災旱蠲貸制

朕自恭臨萬國惠撫兆民遵上古清淨之規削近代繁苛
之政兩稅之外別無徵斂之名八年之間繼有豐穰之瑞

覩流亡之漸復謂富庶之可期爰自今秋偶愆時雨郡縣累陳於災沴關梁亦奏於逃移良由朕刑政或差感通不至責躬罪已靡忘於懷特議優矜庶令安集據河中同華耀陝青齊淄絳萊等州各申災旱損田處已令本道判官檢行不取額定頃畝如保內人戶逃移不得均攤抵納本戶租稅其稅子如闕本色許納諸雜斛斗藿黍充每斗折粟八升今許納本色稗子特與免稅前件遭旱州府據檢到見苗仍恐輸官不迨今祇徵一半稅物仍許於便近州府送納其餘一半放至來年其逃移戶田產仰村隣看守

不得殘毀必在方岳羣后州縣庶官各體憂勤共相勉勵
明詳獄訟恭守詔條上答天災必思於戒懼下除民瘼必
務於撫綏當共卹於疲羸勿自安於逸樂

追冊晉國夫人夏氏爲昭懿皇后制

故晉國夫人夏氏素推仁德久睦宗親嘗施內助之方不
見中興之盛予當御極子並爲王有鵲巢之高無翬衣之
貴貞魂永逝懿範常存攷本朝之文治追冊之制將慰懷
於九族冀叶慶於四星宜追冊爲皇后兼定懿號

欽定全唐文卷一百七目錄

後唐明宗二

恤刑詔

定蕃使朝儀詔

定檢校官所納禮錢詔

再貶豆盧革韋說詔

定奏請判官條例詔

賜鳳翔節度使李勣改名詔

整飭朝參憲臺舊例詔

答盧文紀整飭辭謝朝班等例詔

加鹽都首領官秩詔

嚴斷服飾踰品詔

早赴朝參詔

命孔循往荆南勞問兵士詔

賜劉訓等詔

平朱守殷告諭天下詔

除放積欠詔

賜任圜自盡詔

加恩汴州詔

議追尊名號詔

賜豆盧革韋說自盡詔

申定迴避廟諱詔

誅溫韜等詔

賜五歲童子趙贊及第詔

御署官準同有出身人申送詔

令保戶自供手狀詔

更定注擬詔

答馮道等上尊號詔

貶左散騎常侍蕭希甫詔

升尚書右丞爲正四品詔

賜太師尚書令馬殷諡法詔

錄寫律令格式六典詔

省刑詔

答李祥請蠲除詔

賜吳越國王錢鏐不名詔

誅安重誨詔

令有力人戶均攤貧戶稅額詔

許百姓自鑄農器詔

褒賞呂琦姚遐致等詔

飭定廊餐詔

賜孟知祥詔

賜孟知祥詔

賜孟知祥詔

欽定全唐文卷一百七

後唐明宗 二

恤刑詔

朕臨御寰區當明賞罰刑既加於有罪道貴洽於無私將據親疎宜分皂白特行寬宥俾釋憂疑罪人元行欽孔謙及應犯法人田宅已從籍沒其門人使下任從穩便不詰罪尤灼然有才能者仍許所司錄任

定蕃使朝儀詔

四夷來王厯代故事前後各因強弱撫制互有典儀大蕃

須示於威容即於正衙引對小蕃但推於恩澤仍於偏殿
撫懷憲府奏論禮院詳酌皆徵故實咸有明文正衙威容
未可全廢內殿恩澤且可常行若遇大蕃入朝即準舊儀
於正殿排比鋪陳立仗百官排班於正門引入對見

定檢校官所納禮錢詔

會府華資皇朝寵秩凡霑新命各納禮錢爰自近年多隳
舊制遂致紀綱之地遽成廢墜之司況累條流就從減省
方當提舉宜振規繩但緣其間翊衛勲庸藩宣將佐自軍
功而遷陟示恩澤以獎酬須議從權不在其例其餘自不

帶平章事節度使及防禦團練刺史使府副使行軍已下
三司職掌監務官州縣官凡關此例並可徵納其檢校官
自員外郎至僕射祇初轉一任納錢若不改呼不在徵納
仍委尚書省部司專切檢舉置厯逐月具數申中書門下
再貶豆盧革韋說詔

責授費州司戶參軍豆盧革夷州司戶參軍韋說等自居
台輔累換歲華負先皇倚注之恩失大國調變之理朕自
登宸極常委鈞衡略無謙遜之辭但縱貪饕之意除官受
賄樹黨徇私每虧敬於朕前徒自尊於人上道路之誼騰

不已諫臣之條疏頗多罪狀顯彰典刑斯舉合從極法以塞羣情尚緣臨御之初含宏是務特軫墜泉之慮爰施解網之仁曲示優恩俯寬後命革可陵州長流百姓說可合州長流百姓仍委逐處長知所在同州長春宮判官朝請大夫檢校尚書禮部郎中賜紫金魚袋盧昇將仕郎守尚書屯田員外郎崇文館學士賜緋魚袋韋濤等各因權勢驟列班行無才業以可稱竊寵榮而斯久比行貶謫以塞尤違朕以纂襲之初含容是務父旣寬於後命子宜示於特恩並停見任

定奏請判官條例詔

藩鎮幕職皆有舊規奏薦官寮須循前例苟或隳紊難止
弊訛承前使府奏請判官率皆隨府除移停罷近年流例
有異前規使府雖已除移判官原安舊職起今後若是朝
廷除授者即不計使府除移如是使府奏請即皆隨府移
罷舊例藩侯帶平章事者所奏請判官殿中已上許奏緋
中丞已上許奏紫今不帶平章事亦許同帶平章事例處
分如防禦團練使奏請判官員外郎已下不在奏緋之限
其所奏判官州縣官並須將歷任告身隨奏至京如未有

官假稱試攝亦奏狀內分明署出如藩鎮留後權知軍州事並不在奏請判官之限如刺史要奏州縣官須申本道請發表章不得自奏近日州使奏請從事本無官緒妄結虛銜不計職位高卑多是請兼朱紫不惟紊亂實啟僥求宜令諸道州府切準勅命處分

賜鳳翔節度使李肇改名詔

鳳翔節度使李肇世聯宗屬任重蕃宣慶善有稱忠勤顯著既在維城之例宜新定體之文是降寵光以隆惇敘俾煥成家之美貴崇猶子之親宜於本名上加從字

整飭朝參憲臺舊例詔

御史臺是本朝執憲之司乃四海繩違之地凡居中外皆待整齊藩侯尚展於公參邸吏豈宜於抗禮遽觀論列可驗侮輕但以喪亂滋多綱紀隳紊霜威掃地風憲銷聲今則景運惟新皇圖重正宜加提舉漸止澆訛宜令御史臺凡關舊例並須舉行稍不稟承當行朝典

答盧文紀整飭辭謝朝班等例詔

盧文紀自領憲綱頗思振舉備觀條奏皆叶通規李琪以內殿起居不廢辭謝蓋慮留滯乃是權宜盧文紀以正衙

序班恐墮故事請候次日亦可允依所請三銓免朝事繁
繁省選人既少公務非多宜且依所奏鑠銓前五日免朝
將來人數漸多須容點檢即許開曹後免朝永以爲例付
所司

加蠻都首領官秩詔

朕中興寶祚復正皇綱萬國駢羅俱在照臨之內八紘遠
莫咸居覆載之間矧彼雲南素歸正朔洎平僞蜀思錫舊
恩於乃眷以雖深欲需覃而未暇百蠻都首領李卑晚六
姓蠻都首領勿鄧標莎等天資智勇世稟忠勤梯航之道

路纔通琛賫之貢輸已至率其種落竭乃悃誠備傾向化之心深獎來庭之意今則各頒國寵別進王封其舊州刺史李及大鬼主離吠等或遙貢表函或躬趨朝闕亦宜特授官資各遷階秩勉敦信義無墜冊書示爾金石之堅保我山河之誓欽承休命永保厥終

嚴斷服飾踰品詔

亂離斯久法制多隳不有舉明從何禁止而衣服羈馬之流多踰品式今後三京及州使職員名目是押衙兵馬使指揮使已上騎馬得有暖坐諸都將衙官使下係名籍者

只得衣紫皂庶人商旅只著白衣此後不得參雜兼有富戶或投名於勢要以求影庇或希假於攝貴以免丁徭須議條流以懲踰越如有此色人仰所在禁勘追索文書申奏當行嚴斷以肅姦欺

早赴朝參詔

君使臣以禮臣事君以忠禮不可一日不修忠不可一夕不念二者全則上下順一途廢則出入差須振綱維以嚴規矩凡在策名之列皆知辨色之朝儻不夙興是虧匪懈君上思政猶自求衣未明爲下服勤固合假寐待旦宜令

御史臺徧示文武兩班自此每日早赴朝參職司既得整齊公事的無壅滯如或尚茲懈怠具錄奏聞

命孔循往荆南勞問兵士詔

朕以荆門伐叛方委勲臣而聞統帥縈切戎機勤劬王事致乖攝理深軫寤懷輟卿樞近之繁達我優隆之旨固於旬朔已就宣和苟或尚未全平且要暫還本道便於將息亦可允俞委卿精白凡事詳酌審於準節庶協籌謀料度攻收撫綏軍旅咸繫明略更集殊庸倚注之心再三在念

賜劉訓等詔

朕昨以妙選師臣往除凶孽自長驅於銳旅將併擊於孤城已發使臣疊頒詔諭料龍韜之此舉顧蟻垤以即平今已漸向炎蒸不可持久切在訓齊貔虎速進梯衝必期此月之中須殄干天之逆貴令戰士免至疲勞兼冀生民早諧蘇息惟卿忠烈體朕憂勤儻能克副於指呼便見立成其功效固於酬獎予無恡焉

平朱守殷告諭天下詔

朕以名藩龍潛舊地思覃風教爰議巡遊今月九日至滎陽得朱守殷詐奏本道都指揮使馬彥超等欲謀叛逆輒

使殺害尋令宣徽使范延光徑往撫諭自後更無申奏節
度使宋敬殷及使臣十餘並遭陷沒至十日探知虜掠近
城居人上城閉門顯爲拒捍朕親御六軍徑臨孤壘守殷
逆黨敵於鄭門百姓望風下城效順守殷一家遂自屠戮
尋獲首級已復城池且朱守殷久事本朝繼膺重委洎朕
續承宗社前後累降渥恩統處尹宗薦居節制位兼將相
貴極人臣比謂勦力一心贊時爲國殊不知潛懷梟性暗
蓄狼心全無事上之忠遽恣欺天之意遂加誣於都校兼
殺戮於近臣驅脅生靈拒張車駕果貽衆怒誅厥全宗凶

狂之覺自招悖逆之辜莫追一方既靜萬國永安凡所聞
知當極慶快如有諸色人被朱守殷密行文字妄有扇搖
蓋慮姦細黠黷良善朕皆明察不汝疵瑕當各安懷勿爲
挂慮

除放積欠詔

諸道州府自同光三年已前所欠秋夏稅租并主持務局
敗闕課利并沿河舟船折欠天成元年殘欠夏稅租並特
與除放

賜任圜自盡詔

太子少保致仕任園早推勲舊曾委重難旣退免於劇權
俾優閒於外地而乃不遵禮分潛附守殷緘題罔避於嫌
疑情旨頗彰於怨望自收汴壘備見蹤由若務含宏是孤
典憲尚全大體止罪一身已令本州私第自盡其骨肉親
情僕使等並皆放罪

加恩汴州詔

朕聞后來其蘇動必從於人欲天監厥德靜宜布於國恩
近者優恩多因州使僥門淹留勅命或公然隱匿全不施
行官吏但言幸浚郊暫離洛邑蓋逢歲稔共樂時康不謂

姦官遽彰逆狀爲厲之階旣甚覆宗之禍自貽俾我生靈
遘茲紛擾永言軫惻無輟寐興宜覃雨露之恩式表雲雷
之澤應汴州城內百姓旣經驚劫須議優饒宜放二年屋
稅兼公私債負如是在城迴圖錢物及公私質庫除點簡
見在外實經兵士散失者不計年月遠近並宜蠲放兼不
得輒差配管內戶有因納稅入州便值更變或散失車牛
其車牛許本主識認勤王之節雖出自勲賢入貢之勞抑
繇於使介其有諸道進奉使或已入汴州陷失土貢宜與
收破無勞重有貢輸專人經劫奪者宜與優給不軌之徒

已加顯戮無辜之士當慰幽冤馬彥超宋敬殷等宜與追
贈逆人有子及弟姪者仰並釋放一切不問輦輅之下姦
逆遽興旣難戢於戈鋌因莫分於玉石昨王師攻下汴州
之時翦除凶逆之際恐其士庶偶陷鋒鏑言念傷殂良多
嗟憫宜令石敬瑭徧加存問兼勸在城殺傷人口奏聞量
加給恤衛主亡軀摧凶效命偶徇脅從之勢終懷忠蓋之
誠首議向明理宜行賞昨車駕初到城下之時有將士率
先開門及下城朝見宜令石敬瑭奏聞當與甄酬禁暴戢
兵實由武德安民和衆乃契天心車駕自離洛京戒嚴兵

士不配一物不役一夫河流井水自此外無取尚恐州縣以迎駕爲名妄有配率如或察知必不容恕布澤之命必叶於羣心宥過之文庶臻於至理應天下諸州府見禁囚徒除十惡五逆殺人光火劫盜合造毒藥官典犯贓僞行印信屠牛外罪無輕重並宜釋放瑕疵可滌旣責其自新稂莠未除必從於去害應諸道或有人先偶曾爲非及其背役衙官懼罪藏隱宜令隨處長吏設法招攜各勒歸家一切不問諸色人不得輒有搖動如或自守狂迷尚且結集當令嚴加捕捉無致遁逃貴靜封隅永安黎庶策名筮

仕誠切於進身制祿命官義從於責實旣懲黷貨宜有代耕應天下州縣官員逐月俸料如聞支給多不及時縱或支遣皆是爛弱斛斗旣闕供輸難責廉慎自此隨處官員所破料錢宜逐縣人戶於合送納稅物內計折充支一則免勞於人戶輸納一則便於官僚仍下三司速與計度掄選之道雖在精研調業之勞頗聞艱苦應選人內有過格年深無門參選縱有材器難遂進趨宜令三銓磨勘行止即與今年冬集判成選人例量材注官如或詐稱不在此限爲政之要切在無私聽訟之方唯期不濫天下諸州府

官員如有善推疑獄及曾雪冤濫兼有異政者當具姓名
聞奏別加甄獎敬老之規前王所重養親之道爲子居先
應有年八十已上及家長有廢疾者宜免一丁差役俾遂
奉養許國之心忠貞爲本承家之法孝友爲先應天下有
孝子順孫義夫節婦兄弟繼世義居者隨處長吏聞奏當
行旌表嫌疑之釁多起於蒼黃似是之非率難於明辨應
去年四月一日諸州府軍變內有誣誤身沒者並許子孫
禮葬頃以兩軍對壘仍廢交鋒亡歿甚多暴露不少宜令
滑濮鄆澶衛等州各據地界內有暴露骸骨並與埋瘞仍

差官致祭其餘諸道州府有暴露者亦委長吏指揮埋瘞
夫天災流行時雨愆亢旣關地分宜減國租今歲岐華登
萊自夏稍旱須加軫念以示優恩四州所管百姓令長吏
切加安恤其所旱損田苗宜令檢行詣實申奏與蠲減稅
租仍不得有差徭科配於戲罪已責躬前王之大德滌瑕
盪穢往世之深仁致逆孽之亂常蓋眇沖之寡德誠深惕
厲固敢怠荒旣行逮下之恩當守不移之信更在朝廷卿
士藩翰侯王同堅奉守之心共致治平之道宣布遐邇當
體朕懷

議追尊名號詔

朕聞開國承家得以制禮作樂故三皇不相襲五帝不相沿隨代創規於理無爽矧或情關祖禰事繫烝嘗將崇追遠之文以示化民之道馬縞秉持古學厯覽羣書援兩漢之舊儀雖明按據考百王之立制未盡變通且議謚追尊稱皇與帝既有增減之字合陳褒貶之辭大約二名俱爲尊稱若三皇之代則不可加帝五帝之代亦不可言皇爰自秦朝便兼其號爾後纂業承基之主握乾應運之君洎至我唐不易斯議至若元元皇帝事隔千祀宗追一源猶

顯冊於鴻名豈須遵於漢典況朕居九五之位爲億兆之尊不可總二名於眇躬惜一字於先代苟隨執議何表孝誠又如堯咸舜韶夏松殷柏隨時變禮厥理斯存縞則以徵事上言深觀動靜朕則以奉先爲切慮致因循須足一塗以安四廟可特委宰臣與百官詳定集兩班於中書逐班各陳所見

賜豆盧革韋說自盡詔

陵州合州長流百姓豆盧革韋說頃在先朝擢居重任欺公害物黷貨賣官靜惟肇亂之端更有難容之事且夔忠

萬三州地連巴蜀路扼荆蠻藉皇都弭難之功徇逆帥僭
求之勢罔予視聽率意割移將千里之土疆開通狡穴動
兩川之兵賦禦捍經年致朕莫遂偃戈猶煩運策近者西
方鄴雖復要害高季興尚固窠巢增吾旰食之憂職爾朋
奸之計而又自居貶所繼出流言苟刑戮之稽時處忠良
於何地宜令逐處刺史監賜自盡

申定迴避廟諱詔

本朝列聖及新追四廟諱近日章奏偏傍文字皆闕點畫
凡當出諱止避正呼若迴避於偏傍則虧缺於文字宜從

朴素庶便公私此後凡廟諱但避正文其偏傍文字不必減少點畫

誅溫韜等詔

德州流人溫韜生爲黔首起自綠林依憑中夏干戈劫盜本朝陵寢遼州流人段凝豺狼類性梟獍爲謀無端而幾害平人得便而常懷逆節嵐州司戶陶玘曾司藩翰恣黷貨財自處竄流彌興怨望憲州司戶石知訥比居賓佐合務參揮當守殷閉據夷門發文字扇搖戎帥原州司馬聶嶼擢從班列委出親賢不守條章強買店宅其後細詢行

止頗駭聽聞喪妻未及於半年別成婚媾棄母動逾於千里不奉晨昏而皆自抵刑章各行竄逐都無省過但出怨詞在朕意雖欲含宏於物論固難容舍尚全大體只罪一身並令本處賜死

賜五歲童子趙贊及第詔

都尉之子太尉之孫能念儒書備彰家訓不勞就試特與成名宜賜別勅及第附今年春榜

御署官準同有出身人申送詔

凡於祿仕固有規程發身必藉於器能在任須彰於勞考

否臧斯異黜陟並行朕自統寰區務均渥澤淹滯者皆期振舉勤恪者亦議旌酬旣開進取之門遂有躁求之衆或不守選限捷路希恩或纔罷官資奔波取事侵有數之員闕屈無媒之選人以此比方宜各條理自今後應前資官有出身及兩除官並可依常調赴選兼有莊宗并朕御署亦可準近勅赴選其一任除官未入選緒若無定制難以進身宜約所守官資序高低許令同有出身人合格年限求官赴京日仍須本道申送則與除第二任官兩除後便準常調選人例如此則事有區分人無奔競如藉才器非

時昇擢不在此限

令保戶自供手狀詔

今年夏苗委人戶自供手狀具頃畝多少仍以五家爲保委無隱漏攢連手狀送於本州本州具帳送省州縣不得差人簡括如或人戶隱欺許令保內陳告其田並令倍徵更定注擬詔

本朝一統之時除嶺南黔中去京地遠三年一降選補使號爲南選外其餘諸道及京有司諸色選人每年動及數千分在三銓尚爲繁重近代選人每年不過數百何必以

一司公事作三處官方況有格條各依資考兼又明行勅命務絕阿私宜新公共之規俾慎官常之要其諸道選人宜令三銓官員都在省署子細磨勘無違礙後即據格同商量注擬連署申奏仍不得踵前於私第注官如此則人吏易可整齊公事亦無遲滯

答馮道等上尊號詔

朕顧惟涼德獲紹丕基賴心膂之訏謨繫股肱之寅亮懼難負荷嘗勵齋莊惟誠荒寧敢自滿假卿等謨猷迭著翼亮彌勤遽以鴻名將加眇質雖驗忠貞之懇誠非謙慎之

懷往年繼上封章累增宣達近者告虔宗廟展禮郊丘皆
輔弼之盡心亦續承之常道縱頻摧北虜烽燧猶存雖稍
靜南方車書未混至於年穀豐稔皆繇台輔變調豈予冲
人當斯盛美爾宜明予畏相體朕師臣勉務弼諧無忘裨
救堯舜禹湯之大道足可敷陳聖明神武之虛名無煩往
復諒茲深意即斷來表

貶左散騎常侍蕭希甫詔

左散騎常侍集賢殿學士判院事蕭希甫身處班行職非
警察輒引凶狂之輩上陳誣訛之詞逼近郊裡扇搖軍衆

李筠既當誅戮希甫寧免謫遷可貶嵐州司戶參軍仍馳驛發遣

升尚書右丞爲正四品詔

臺轄之司官資並設左右貂素來相類左右揆不至相懸以此比方豈宜分別自此宜升尚書右丞官品與左丞並爲正四品

賜太師尚書令馬殷謚法詔

故天策上將軍守太師尚書令楚國王馬殷品位俱高封崇已極無官可贈宜賜謚及神道碑文仍以王禮葬

錄寫律令格式六典詔

要道纔行則千歧共貫宏綱一舉則萬目皆張前王之法
制罔殊百代之科條悉在無煩改作各有定規守度程者
心逸日休率胷臆者心勞日拙天垂萬象星辰之分野靡
差地載羣倫嶽瀆之方隅不易儻各司其局則皆盡其心
且律令格式六典凡關庶政互有區分久不舉行遂至墮
紊宜準舊制令百司各於其間錄出本局公事巨細一一
抄寫不得漏落纖毫集成卷軸兼粉壁書在公廳若未有
廳署者其文書委官司主掌仍每有新授官到令自寫錄

一本披尋或因顧問之時應對須知次第無容曠闕每在
執行使庶寮則守法奉公宰臣則提綱振領必當彝倫攸
敘所謂至道不繁何必期年然後報政宜令御史臺徧加
告諭催促限兩月抄錄及粉壁書寫須畢其間或有未可
便行及曾釐革事件委逐司旋申中書門下當更參酌奏
覆施行

省刑詔

久愆時雨深疚予心雖遍虔祈猶未溥足宜廣推恩之道
更敷恤物之懷貴獲感通必彰靈應宜令諸道州府各委

金定全居五 卷二十一
長吏親問刑獄省察冤濫應見禁囚徒除死罪外餘盡及時疏放除省司主持迴圖敗闕軍將及諸色人等見別指揮三司商量或有情可矜憫或非欺罔積年致有逋懸各具分析續行勅命并公私債負放至秋熟填納今年取者不在此限

答李祥請蠲除詔

地道安靜以動爲異前文備載歷代不無因有災祥深加儆戒朕自登九五每念生靈樂聞忠正之言惡見驕奢之事歲時豐稔中外和同近聞河南數數地動駭彼羣聽深

軫予衷李祥居諫諍之官抱謹直之氣懇裨正道特上封
章恐朕忘勦業艱難之時有功成矜滿之意不惟舉職備
見爲時況朕守聽政之勤如踐祚之始嘗持翼翼不忘兢
兢今更體李祥之言以前代爲鑒理不忘亂安不忘危臣
下須進思盡忠退思補過日慎一日有始有終如此則何
休祥之不臻何咎徵之不泯唯并州之地乃豐沛之鄉已
命親賢往分憂寄必資愼靜專務輯綏刑獄之間不得令
有冤滯凡關利濟并許奏聞事有不便於民皆須止絕其
北京山川之神仍宜差官專往祭禱朝廷靜可以惠四海

侯伯靜可以福一方冀安比屋之人以鎮興王之地

賜吳越國王錢鏐不名詔

周崇呂望有尚父之榮漢重蕭何有不名之禮錢鏐冠公侯之位疏吳越之封宜示異恩俾當縉禮其錢鏐宜賜不名

誅安重誨詔

朕猥以眇躬纘承丕構欲華夷之共泰於刑賞以無私其有位極人臣寵踰涯分擅威權而積惡詢物議以難容苟緩刑章是滋凶慝安重誨始從幼稚獲備指揮旣倚注以

漸深亦旌酬而益甚自朕紹興王業委掌樞機官列三公
望崇四輔謂勤劬之可恃每率暴以居懷且孟知祥董璋
自守藩維素堅臣節輒從間謀令負憂疑擢任姻親往分
符竹潛設猜防之計擅興割據之言兩川飲恨以俱深一
旦飛章而頓絕又錢鏐位冠王公嘗輸愛戴朕方禮優元
老恩遇遠人而重誨採掇瑕疵遽行止絕且去年郊天禮
畢率土乂康重誨旣綰國權復希兵柄輒出渡淮之語貴
邀統衆之名事雖不行謀實可懼其後終興戈甲遽討巴
邛將士疲勞梯船阻絕又遣專臨寨所俾料軍儲恣威虐

以復多致民兵之共怨朕尚存大體特示優恩爰自禁庭
委之藩翰方緊共理旋乃貢章豈謂別有動搖潛懷怨望
長子崇緒親居內職次子崇贊顯列朝行遣彼元隨偷歸
本道據茲悖逆須究端繇勞千里以興師致四方之駭聽
果明罪釁難逭誅夷其安重誨宜削奪自身官爵仍并男
崇贊崇緒及重誨妻阿張等四人宜並賜死

令有力人戶均攤貧戶稅額詔

務穡勸耕前賢之令範哀多益寡往聖之格言比者諸道
賦稅一定數額廣種不編於帳案頻通恐撓於鄉村如聞

不逮之家困於輸納爰議有餘之戶共與均攤貴表一時之恩不作常年之例宜委諸道觀察使於屬縣每村定有力戶一人充村長於村人議有力人戶出剩田苗補下貧不逮頃畝自肯者即具狀徵收有詞者即排段檢括便自今年起爲定額

許百姓自鑄農器詔

富民之道莫尚於務農力田之資必先於利器器苟不利民何以安近聞諸道監冶所賣農器或大小異同或形狀輕怯纔當墾闢旋致損傷近百姓秋稼雖登時物頗賤既

艱難於買置遂抵犯於條章苟利錐刀擅興鑪冶稍聞彰露須議誅夷緩之則贍國不充急之則殘民轉盛加以巡檢節級騷擾鄉間但益煩苛殊非通濟欲使上不奪山川之利下皆遂畝畝之宜務在從長庶能經久自今後不計農器燒器動使諸物並許百姓逐便自鑄諸道監冶除依常年定數鑄辦供軍熟鐵并器物外只管出生鐵比已前價各隨逐處見定高低每斤一例減十文貨賣雜使熟鐵亦任百姓自揀巡檢節級勾當賣鐵場官并鋪戶等一切並廢鄉村百姓只於係省秋夏田畝上每畝納農器錢一

錢五分足陌隨秋夏稅二時送納去

褒賞呂琦姚遐致等詔

國祚中興皇綱再整合頒公事徧委羣臣先勅抄錄六典
法書分爲二百四十卷從朝至夕自夏徂冬御史臺官員
等或同切催驅或遞專勘讀校前王之舊制布當代之明
規宜有獎酬以勵勤恪御史丞劉贊近別除官今加階爵
宜從別刺處分呂琦姚遐致宜加朝散大夫李凝吉朝議
大夫馬義朝朝散大夫仍賜柱國勲干遼李濤並朝散大
夫徐禹卿張可復王曉並賜緋魚袋

飭定廊餐詔

文武兩班每遇入閣賜食從前御史臺官及諸朝官皆在
敷政門外兩廊食唯北省官於敷政門內別坐既爲隔門
各不相見致行坐不齊難於肅整今後每遇入閣賜食北
省官亦宜令於敷政門外東廊下設席以北爲首待班齊
一時就坐

賜孟知祥詔

省洋州及興元奏探聞得董璋把截劔門關路不通利州
與西川往來兼稱董璋自領徒黨侵逼西川管界西川已

出兵士禦備其利州人情不安未知兩川的實音耗等事
朕聞天惟福善神必禍淫元鑒昭然冥符定矣故積功累
仁者無所不濟窮兵黷武者未或不亡是以齊國尊周終
全霸業吳王伐越自取喪亡累驗古今足分成敗卿時推
閒傑世仰全才知治亂於未萌測安危於未兆首參締構
再復宗祧英謀迴掩於耿吳茂業遐超於申甫論功爲最
錫壤居先自居守於北門往鎮臨於西蜀安民有術撫衆
多恩方靜治於龜城期永扶於鳳闕董璋比膺朝寄薦領
戎旃曾無犬馬之勞但縱豺狼之性頃歲潛懷逆節密設

奸機志欲兼并懇謀間諜始奏卿之得失知朕不容後說
朝廷之短長圖卿相信只憑詭詐便欲侵吞欲西犯於蜀
川遂東窺於閬郡不煩覲縷可驗包藏亂常之罪惡旣彰
伐叛之刑書難赦朕乃睠求良帥殄滅凶渠此際尋委卿
兼東川行營供饋應接使方倚仗於戚藩俄阻艱於寇境
路歧雖隔情好如初中間令進奏官蘇愿及進奉軍將杜
紹本等相次歸還令傳詔旨想其到彼備達予懷卿制敵
多方折衝有備雖深嫉惡猶示睦隣尚抑驍雄觀其釁隙
而董璋果然顛蹶盡露奸邪初控扼於劔門遽侵騷於錦

里爲臣若此滅族非遙卿可嚴誠師徒妙抒籌畫按茲良
便速殄元凶朕亦尋遣軍前徑臨境上爲卿犄角扼賊咽
喉佇掃蕩於氛霾復流通於信使當覃異渥式獎殊功卿
宜慎固遠圖秉扶大節保君臣之重義成家世之美名況
卿骨肉至多邱園在此自來存問並得安全可表朕之倚
卿所冀卿之爲朕佇觀英斷定集大勲豈惟只委於節旄
長居貴盛兼俟別頒於綸綍更廣封崇奸醜自分始終可
鑒其爲眷注無忘寐興今遣卿外甥李瓌齎詔慰諭想當
知悉

賜孟知祥詔

省所奏東川董璋爰自爲隣從初不睦嘗厚誣於表疏每
深間於朝廷欲竊兵權來併土宇忽去年四月二十八日
暴興兵士至五月一日驟入漢州尋差馬步都指揮使兼
知武信軍節度留後李仁罕右廂馬步都指揮使兼知寧
江軍節度兵馬留後張知鄴衙內都指揮使兼知昭武軍
留後李肇等各於界分警備又令副使權知武泰軍節度
留後趙季良在府巡守其左廂馬步都指揮使兼知保寧
軍節度留後趙廷隱先次部領兵士三萬人出次新都卿

自統領衙隊二萬人騎繼進至三日交戰殺敗董璋斬首
萬餘級執八千人擒賊將校八十餘員甲馬七百匹收衣
甲器械十萬事其董璋與男光嗣四日巳時走入東川前
陵州刺史王暉斬璋父子首級來獻軍門尋收下東川城
又奏今夏方議賞功其文武將吏等衆意難違巳取六月
十一日權兼東川指揮公事具悉朕以董璋位列山河名
兼將相全昧輸忠事主以禮睦隣輒恣凶狂擬謀吞噬譖
卿則妄呈章奏誑朕則欲竊兵權奸計未成賊機尋露旣
無間於搆惑唯有志以攻侵卿雖認包藏久從含忍但務

戢兵而靜治只期應敵以禦衝俟落穀中即加翦撲若居
度外且示協和而董璋果出妖巢暴興叛黨忽犯成都之
境驟踰漢郡之疆蟻聚蜂屯鴟張豕突謂錦川而可取謂
天網而可逃及卿密運戎機大張軍勢劒戟川排而亘野
旌旗雲布以蔽天鵝鸛纔交豺狼已殄棄甲者追擒旣盡
投羅者剿戮無遺尋迫元凶遁歸孤壘不暇守陴而慟哭
便當傳首以迎降惡蔓頓除禍胎全拔永肅潼江之波浪
盡收鄆道之封疆不有賢良誰分憂寄儻非英特孰靜方
隅紀功而煥耀旂常載德而輝華簡冊捷音初至慶快良

深嘉歎之餘旌醕是切況聞衆懇已請兼權實契朕懷即
加真命其爲睦矚無忘寐興其立功將校權兼留務李仁
罕張知鄴李肇趙季良已下咸著忠良亦須正授續行渥
澤相次獎酬想宜知悉

賜孟知祥詔

朕猥以眇躬續承丕構賴忠良之共理冀寰宇之永康矧
念元勲早聯懿戚永保君臣之分足論終始之心卿出應
貞期生符間氣洞曉圯橋之兵略元通渭水之戎韜重整
漢儀首參大計再隆周道迴立殊功實有令名載於良史

是膺朝獎繼領藩宣外則覃聲教於百蠻內則效忠勤於
雙闕交修職貢備竭臣誠方表率於諸侯永維持於景運
不謂董璋夙懷蠱毒潛貯狼貪擬吞并於仁封詐傾輸於
直節密飛章奏累述事機或敍卿之短長或報卿之動靜
無非鬪激每欲攻侵朝廷貴要協和久從隱忍表文具在
事狀甚明又知不納其讒邪乃去反陳於離間仍於隣道
頓起釁端只憑誑惑之詞便縱窺覷之暴旣干紀律須舉
憲章爰命帥臣共平寇孽此際遂委卿兼東川行營供饋
應接使如斯倚注豈有猜嫌渥澤方行使車將發旋屬道

塗之阻塞復當邊境之沸騰繇是去意莫通來音亦絕偶
致關防之多事久聞分野之延災蓋以朕至德未孚純風
未洽每自責躬罪已敢忘旰食宵衣況卿動稟箴規深懷
鑒識從初料其操守豈敢徇彼狂迷只應屢中巧言偶生
疑論遂且徐觀其向背終圖自別於妍媸其間但務訓兵
止期應敵遐想勤王之力詎移許國之心所以中間先令
進奏官蘇愿及進奉軍將杜紹本等相次歸還式明安慰
朕又知董璋果謀鼠竊轉恣鴟張輒侵岷益之崇封俄越
梓潼之末界茲察詭計究彼初心附皮毛脣齒之歡足明

矯妄竊郡邑金湯之利可驗包藏朕乃尋遣近臣徑齎明
詔示其犄角表此招懷仍許優恩別傳密旨果聞卿意備
體予懷即決遠圖亟回英斷驅銳旅而旣殲寇黨取危城
而方剿渠魁爰效至忠克全大節盡傾衷素疊貢封章併
祛往日之疑襟細述此時之戎事大朝正朔奉之不渝列
鎮規程守之無易仍厚支其館穀濟關過之王人載認恭
勤益明尊獎尚未舛誤得以平持今後協和自然悠久魚
水之情宛在山河之任永居足保勲榮轉期富貴至於封
賞固不食言凡在繁文更宜宣力嘉歎之外注矚斯深